

Despedida awe di Ron Wever, un genio, maestro admirable di caricatura

Awe Aruba ta despedi di Ronald James Wever, mihor conoci como **Ron Wever**, caricaturista di **DIARIO**. Pa mi Ron ta un di e figuranan artistico grandi di nos isla cu nunca a ricibi e reconocimiento cu el a merece. Pero Ron tabata tambe un persona cu nunca a pusha su mes, nunca a busca publicidad, y semper a prefera di keda humildemente tras di Cortina.

Ron ta un di e artistanan **pintor, ilustrador y caricaturista** mas grandi cu Aruba a conoce. Ta dos caricaturista grandi mi a conoce den mi bida aki na Aruba cu mi por elogia na grandi. Eseyan ta **Leo Kuiperi d.f.m y Ron**, awe d.f.m. Cada un cu su propio estilo y talento grandi.

Pa decenas di aña Aruba a goza diariamente di caricaturanan di Ron publica den **DIARIO**. Ron cu nunca tabata un persona cu interes politico. Den su arte semper el a keda mas neutral posible. Su caricaturanan critico tabata riba politiconan di tur color, sin nunca a privilegia un mas cu otro. E tabata un maestro den pinta caricatura di cualquier politico, di cualquier personahe di nos comunidad, den tur manera desforma (pa ta un caricatura) y semper por a saca afo cu e ta referi na tal persona of politico.

Ron tabata **"campeon"** den usa animalnan, insectonan y tur sorto di bestia den su caricaturanan, pone nan papia y cu esun cu ta mira e caricatura, den su mente ta mira un humano na lugar di un animal of insecto.

Su figuranan di choller (**Highlo por ehemplo**) y pa distingui un for di otro tabata asina sublime cu, manera bo mira e figura, bo sa mes ora cu ta trata di tal y tal.

Masha unico tabata su **MAL uso di Papiamento**. Ron tabata usa e Papiamento di mas malo cu tin como su textonan y remarcable tabata cu **NINGUN**

hende ta reclama algo tocante esaki pasobra nan sa cu esey ta e estilo, e toke artistico di **RON**. Ningun hende ta mira un error den su textonan cu ta sali masha humoristico, mescos cu su figuranan.

Ron tabata tin **un mente di genio**, no solamente pa su creatividad pero tambe **pa su imaginacion** pa produci un obra artistico.

Ron ta yama mi persona, of Django of un di nos redactornan y puntra **"Kico tin awe?"** Si no tin ago, e ta bisa: **"no preocupa, mi ta busca algo"**. Su dia siguiente e ta presenta den **DIARIO** un caricatura cu ta lagabo babuca y pensando: **"di unda el a saca e imaginacion ey?"** Mi lo por hasta tripi di bisa cu eseyan ta e mihor obranan cu e ta produci y cu hende ta papia di dje.

Ron no tabata **"biba na DIARIO"** manera sa expresa na Papiamento. Sporadicamente e ta presenta na **DIARIO** y bishita

redaccion, pasobra su oficina tabata su cas. Ora e bishita **DIARIO** ta tur cos ta para. Ta harimento so tin pa su humor. E tabata ademas un caha di pregunta. E por menciona cantidad di frase, pero entre mas cu mitar di nan e tin un pregunta pa haci. Ta tur cos e kier sa di tur hende y di m undo henter. Pero ora e papia y expresa su mes directamente, keda leu. Bo nunca sa kico ta e palabranan cu ta sali for di su boca, y e por picabo cu un expresion of frase, y ta despues bo ta realiza cu el a ponebo na bo lugar na un manera fini. Pa ora bo kier reacciona ya bo ta laat y el a cana bay **"lorando su shag"**.

Un cos sigur di Ron tabata tambe cu si e aceptabo como amigo, ta un amigo mes bo ta cerca dje, y bo no por keda sin tin e como bo amigo. Den e ultimo añanan cu e tabata malo, drenta y sali di hospital y ora cu e ta afo cu e bishita **DIARIO**, semper tabata un placer enorme pa tin e den oficina. E ta sinta dilanti Django cu tur hende rond di dje, y djs papia **"loke tur hende y bestia ta haci"**. Harimento tras di harimento tin e ora nan ey. Tiramento di palabra, tentamento, termento, bullying entre amigonan y e diferencia ta wordo sinti den e ambiente asina cu

e sali bay. Mi tin cu kita sombre pa Django cu constantemente tabata bishit'e na hospital. Nos tabata sinta conversa semanalmente tocante Ron, y loke ta bin dilanti continuamente ta e stimacion cu Ron tin pa su mama. **Su mama Annie semper tabata tur cos pe.**

Mi a keda sin skirbi tocante Ron e dianan cu a pasa pasobra mi kier a mira kendenan lo skirbi algo den un of otro medio tocante Ron. Pa mi semper Ron tabata e artista lubida. **E artista cu NUNCA a ricibi e reconocimiento cu el a merece NA BIDA.**

Ron a colabora cu masha hopi autor di buki, di novela, proza, buki di mucha y buki di poesia. E tabata

ilustrador pa hopi buki. Ademas el a colabora cu hopi fundacion y organizacion cu su arte y talento. El a pinta portada pa hopi publicacion y di mi persona 3 publicacion cu a sali caba y un di 4 cu for di 2000 ta cla y ainda no a keda publica pa **"equis"** motibonan, pero cu lo bin si.

Mi a keda babuca cu mi no a mira algo di ningun organizacion of persona dedica na Ron, pero como mi sa cu awe ta despedida, mi a dicidi pa awe publica y no warda mas.

Nos a perde un amigo grandi, un artista cu pa mi tabata un genio y maestro pintor, un talento cu ta masha poco tin riba e isla aki di e nivel di mas halto. Ta di spera cu ora lectornan mira caricaturanan di kende cu ta entrante awe, pa nan keda corda semper riba Ron pa e grandi cu e tabata como artista. Cu amigo Ron sosega na paz den braza di Senior.

Juby Naar

